



王維傳

宋祁撰

王維字摩詰九歲知屬辭與弟縉齊名資孝友開元初擢進士調大樂丞坐累為濟州司倉參軍張九齡執政擢右拾遺歷監察御史母喪毀幾不生服除累遷給事中安祿山反玄宗西狩維為賊得以藥下利陽瘖祿山素知其才迎置洛陽迫為給事中祿山大宴凝碧池悉召梨園諸工合樂諸工皆泣維聞悲

甚賦詩悼痛賊平皆下獄或以詩聞行在時
縉位已顯請削官贖維罪肅宗亦自憐之下
遷太子中允久之遷中庶子三遷尚書右丞
縉為蜀州刺史未還維自表已有五短縉五
長臣在省戶縉遠方願歸所任官放田里使
縉得還京師議者不之罪久乃召縉為左散
騎常侍上元初卒年六十一疾甚縉在鳳翔
作書與別又遺親故書數幅停筆而化贈祕
書監維工草隸善畫名盛於開元天寶間豪

英貴人虛左以迎寧薛諸王待若師友畫思
入神至山水平遠雲勢石色繪工以為天機
所到學者不及也客有以按樂圖示者無題
識維徐曰此霓裳第三疊最初拍也客未然
引工按曲乃信兄弟皆篤志奉佛食不葷衣
不文綵別墅在輞川地奇勝有華子岡歌湖
竹里館柳浪茱萸泝辛夷塢與裴迪游其中
賦詩相酬為樂喪妻不娶孤居三十年母亡
表輞川第為寺終葬其西寶應中代宗語縉

曰朕嘗於諸王座聞維樂章今傳幾何遣中
人王承華往取縉裒集數十百篇上之

王摩詰集卷第一

賦

白鸚鵡賦

若夫名依西域族本南海同朱喙之清音變
綠衣於素彩惟茲鳥之可貴諒其美之斯在
夫其入翫於人見珍竒質狎蘭房之妖女去
桂林之雲日易喬枝以羅袖代危巢以瓊室
慕侶方遠依人永畢託言語而雖通顧形影
而非匹經過珠網出入金鋪單鳴無應隻影

長孤偶白鷗於池側對皓鶴於庭隅愁混色
而難辨願知名而自呼明心有識懷思無極
芳樹絕想雕梁撫翼時銜花而不言每投人
以方息慧性孤稟雅容非飾含火德之明輝
被金方之正色至如海燕呈瑞有玉筐之可
依山雞學舞向寶鏡而知歸皆羽毛之偉麗
奉日月之光輝豈憐茲鳥地遠形微色凌紈
質彩奪繒衣深籠夕閉喬木長違儻見借其
羽翼與遷鶯而共飛

四言詩

酬諸公見過

嗟余未喪哀此孤生屑居藍田薄地躬耕歲
晏輸稅以奉粢盛晨往東臬草露未晞暮看
煙火負擔來歸我聞有客足掃荆扉簞食伊
何甌瓜抓棗仰厠群賢皤然一老愧無筦簞
班荆席藁汎汎登陂折彼荷花淨觀素鮪俯
映白沙山鳥群飛日隱輕霞登車上馬倏忽
雨散雀噪荒村雞鳴空館還復幽獨重欷累

歎

五言古詩

從軍行

吹角動行人
喧喧行人起
笳悲馬嘶亂
爭渡金河水
日暮沙漠垂
戰聲煙塵裏
盡繫名王頸
歸來獻天子

隴西行

十里一走馬
五里一揚鞭
都護軍書至
匈奴圍酒泉
關山正飛雪
烽戍斷無煙

早春行

紫梅發初遍
黃鳥歌猶澁
誰家折楊女
弄春如不及
愛水看粧坐
羞人映花立
香畏風吹散
衣愁露霑濕
玉閨青門裏
日落香車入
游衍益相思
含啼向綵帷
憶君長入夢
歸晚更生疑
不及紅簷鸞
雙栖綠草時

扶南曲歌詞五首

翠羽流蘇帳
春眠曙不開
羞從面色起
嬌逐語聲來
早向昭陽殿
君王中使催

堂上青絃動堂前綺席陳齊歌盧女曲雙舞
洛陽人傾國徒相看寧知心所親

香氣傳空滿粧華影箔通歌聞天仗外舞出
御樓中日暮歸何處花間長樂宮

宮女還金屋將眠復畏明入春輕衣好半夜
薄粧成拂曙朝前殿玉墀多珮聲

朝日照綺窓佳人坐臨鏡散黛恨猶輕插釵
嫌未正同心勿遽遊幸待春粧竟

奉和聖製登降聖觀與宰臣等同望

應制

鳳袞朝碧落龍圖耀金鏡維岳降二臣戴天
臨萬姓山川八校滿井邑三農竟比屋皆可
封誰家不相慶林疎遠村出野曠寒山靜帝
城雲裏深渭水天邊映喜氣含風景頌聲溢
歌詠端拱能任賢彌彰聖君聖

奉和聖製御春明樓臨右相園亭賦

樂賢詩應制

複道通長樂青門臨上路遙聞鳳吹喧闈識

龍輿度褭旒明四目伏檻紆三顧小苑接侯
家飛甍映宮樹商山原上碧澹水林端素銀
漢下天章瓊筵承湛露將非富人寵信以平
戎故從來簡帝心詎得迴天步

奉和聖製送不蒙都護兼鴻臚卿歸

安西應制

上卿增命服都護揚歸旆雜虜盡朝周諸胡
皆自鄮鳴笳翰海曲按節陽關外落日下河
源寒山靜秋塞萬方氛祲息六合乾坤大無
物是天心天心同覆載

瓜園詩并序

維瓜園高齋俯視南山形勝二三時輩同賦
是詩兼命詞英數公同用園字爲韻韻任多
少時太子司議郎薛璠發此題遂同諸公云
余適欲鋤瓜倚鋤聽叩門鳴騶導駉馬常從
夾朱軒窮巷正傳呼故人儻相存攜手追涼
風放心望乾坤藹藹帝王州宮觀一何繁林
端出綺道殿頂搖華幡素懷在青山若值白

雲屯迴風城西雨返景原上村前酌盈樽酒
往往聞清言黃鸝轉深木朱槿照中園猶羨
松下客石上聞清猿

同盧拾遺章給事東山別業二十韻
給事首春休沐維已陪遊及乎是行
亦預聞命會無車馬不果斯諾

託身侍雲陛昧早趨華軒遂陪鵷鴻侶霄漢
同飛翻君子垂惠顧期我於田園側聞景龍
際親降南面尊萬乘駐山外順風祈一言高

陽多夔龍荆山積璵璠盛德啓前烈大賢鍾
後昆侍郎文昌宮給事東掖垣謁帝俱來下
冠蓋盈丘樊閨風首邦族庭訓延鄉村菜地
包山河樹井竟川原巖端迴綺檻谷口開朱
門階下群峯首雲中瀑水源鳴玉滿春山列
筵先朝暇會舞何颯踏擊鍾彌朝昏是時陽
和節清晝猶未暄藹藹樹色深嚶嚶鳥聲繁
顧已負宿諾延頸慙芳蓀蹇步守窮巷高駕
難攀援素是獨往客脫冠情彌敦

和使君五郎西樓望遠思歸

高樓望所思目極情未畢枕上見千里窓中
窺萬室悠悠長路人曖曖遠郊日惆悵極浦
外迢迢孤煙出能賦屬上才思歸同下秩故
鄉不可見雲水空如一

酬黎居士浙川作曇壁上入院走筆
成

儂家真箇去公定隨儂否着處是蓮花無心
變楊柳松龕藏藥裹石脣安茶臼氣味當共
知那能不携手

奉寄韋太守陟

荒城自蕭索萬里山河空天高秋日迥嘹唳
聞歸鴻寒塘映衰草高館落踈桐臨此歲方
晏顧景詠悲翁故人不可見寂寞平陵東

林園即事寄舍弟統

寓目一蕭散消愛冀俄頃青草肅澄陂白雲
移翠嶺後沔通河渭前山包鄆郢松含風裏
聲花對池中影也多齊石瘡人帶荊州癭徒

思赤筆書詎有丹砂井心悲常欲絕髮亂不
能整青簾日何長閑門晝方靜頽思茅簷下
彌傷好風景

贈從弟司庫員外綵

少年識事淺強學干名利徒聞躍馬年苦無
出人智即事豈徒言累官非不試既寡遂性
歡恐招負時累清冬見遠山積雪凝蒼翠皓
然出東林發我遺世意惠連素清賞夙語塵
外事欲緩攜手期流年一何駛

座上走筆贈薛璩慕容損

希世無高節絕跡有卑棲君徒視人文吾固
和天倪緬然萬物始及與群牧齊分地依后
稷用天信重黎春風何豫人令我思東溪草
色有佳意花枝稍含萋更待風景好與君藉
萋萋

贈李頎

聞君餌丹砂甚有好顏色不知從今去幾時
生羽翼王母翳華芝望爾崑崙側文螭從赤

豹萬里方一息悲哉世上人甘此羶腥食

贈劉藍田

籬中犬迎吠出屋候柴扉歲晏輸井稅山村
人夜歸晚田始家食餘布成我衣詎肯無公
事煩君問是非

贈房盧氏瑄

達人無不可忘已愛蒼生豈復少十室絃歌
在兩楹浮人日已歸但坐事農耕桑榆鬱相
望邑里多鷄鳴秋山一何淨蒼翠臨寒城視
事兼偃卧對書不簪纓蕭條人吏踈鳥雀下
空庭鄙夫心所尚晚節異平生將從海岳居
守靜解天刑或可累安邑茅茨君試營

贈祖三詠

蟪蛄掛虛牖蟋蟀鳴前除歲晏涼風至君子
復何如高館閒無人離居不可道閑門寂已
閑落日照秋草誰有近音信千里阻河關中
復客汝潁去年歸舊山結交二十載不得一
日展貧病子既深契闊余不淺仲秋雖未歸

暮秋以為期良會詎幾日終日長相思
春夜竹亭贈錢少府歸藍田

夜靜群動息時聞隔林犬卻憶山中時人家
澗西遠羨君明發去采蕨輕軒冕

酬前

錢起

山月隨客來主人興不淺今宵竹林下誰覺
花源遠惆悵曙鶯啼孤雲還絕巘

贈張五弟諲三首

吾弟東山時心尚一何遠日高猶自卧鍾動
始能飯領上髮未梳牀頭書不卷清川與悠
悠空林對偃蹇青苔石上淨細草松下軟窓
外鳥聲閑啾前虎心善徒然萬像多澹爾太
虛緬一知與物平自顧為人淺對君忽自得
浮念不煩遣

張弟五車書讀書仍隱居染翰過草聖賦詩
輕子虛閉門二室下隱居十年餘宛是野人
也時從漁父魚秋風日蕭索五柳高且踈望
此去人世渡水向吾廬歲晏同携手只應君

與子

設置守甕兔垂釣伺游鱗此是安口腹非關
慕隱淪吾生好清靜蔬食去情塵今子方豪
蕩思為鼎食人我家南山下動息自遺身入
鳥不相亂見獸皆相親雲霞成伴侶虛白侍
衣巾何事須夫子邀子谷口真

至滑州隔河望黎陽憶丁三寓

隔河見桑柘藹藹黎陽川望望行漸遠孤峯
沒雲煙故人不可見河水復悠然賴有政聲

遠時聞行路傳

秋夜獨坐懷內弟崔興宗

夜靜群動息蟪蛄聲悠悠庭槐北風響日夕
方高秋思子整羽翰及時當雲浮吾生將白
首歲晏思滄洲高足在旦暮肯為南畝儔

胡居士卧病遺米因贈

了觀四大因根性何所有妄計苟不生是身
孰休咎色聲何謂客蔭界復誰守徒言蓮花
目豈惡楊枝肘既飽香積飯不醉聲聞酒有

無斷常見生滅幻夢受即病即實相趨空定
狂走無有一法真無有一法垢居士素通達
隨宜善斗擲牀上無羶卧鍋中有粥否齋時
不乞食定應空漱口聊持數斗米且救浮生
取

贈裴十迪

風景日夕佳與君賦新詩澹然望遠空如意
方支願春風動百草蘭蕙生我籬曖曖日暖
閨田家來致詞欣欣春還臯淡淡水生陂桃
李雖未開萋萋滿芳枝請君理還策敢告將
農時

與胡居士皆病寄此詩兼示學人二
首

一興微塵念橫有朝露身如是觀蔭界何方
置我人礙有固為主趣空寧捨寶洗心詎懸
解悟道正迷津因愛果生病從貪始覺貧色
聲非彼妄浮幻即吾真四達竟何遣萬殊安
可塵胡生但高枕寂寞與誰鄰戰勝不謀食

理齊甘負薪予若未始異詎論踈與親
浮空徒漫漫 有定悠悠無乘及乘者所謂
智人舟詎捨貧病域不疲生死流無煩君喻
馬任以我爲牛植福祠迦葉求仁笑孔丘何
津不鼓棹何路不摧輶念此聞思者胡爲多
阻脩空虛花聚散煩惱樹稀稠滅想成無記
生心坐有求降吳復歸蜀不到莫相尤

華嶽

西嶽出浮雲積翠在大清連天疑黛色百里
遙青冥白日爲之寒森沉華陰城昔聞乾坤
閉造化生巨靈右足踏方止左手推削成天
地忽開折大河注東溟遂爲西峙嶽雄雄鎮
秦京大君包覆載至德被群生上帝佇昭告
金天思奉迎人祇望幸久何獨禪云亭

藍田山石門精舍

落日山水好漾舟信歸風玩竒不覺遠因以
緣源窮遙愛雲木秀初疑路不同安知清流
轉偶與前山通捨舟理輕策果然愜所適老

僧四五人逍遙蔭松栢朝梵林未曙夜禪山
更寂道心及牧童世事問樵客暝宿長林下
焚香卧瑤席澗芳襲人衣山月映石壁再尋
畏迷誤明發更登歷笑謝桃源人花紅復來
覲

青溪

言入黃花川每逐青溪水隨山將萬轉趣途
無百里聲喧亂石中色靜深松裏漾漾沈菱
荇澄澄映葭葦我心素已閑清川澹如此請
留盤石上垂釣將已矣

崔僕陽兄季重前山興

秋色有佳興況君池上閑悠悠西林下自識
門前山千里橫黛色數峯出雲間嵯峨對秦
國合沓藏荆關殘雨斜日照夕嵐飛鳥還故
人今尚爾嘆息此顏顏

李處士山居

君子盈天階小人甘自免方隨鍊金客林上
家絕巘背嶺花未開入雲樹深淺清晝猶自

眠山鳥時一轉

丁寓田家有贈

君心尚棲隱久欲傍歸路在朝每爲言解印
果成趣晨雞鳴鄰里群動從所務農夫行餉
田閨妾起縫素開軒御衣服散帙理章句時
吟招隱詩或製閑居賦新晴望郊郭日映桑
榆暮陰盡小苑城微明渭川樹揆予宅間井
幽賞何由屢道存終不忘迹異難相遇此時
惜離別再來芳菲度

渭川田家

斜光照墟落窮巷牛羊歸野老念牧童倚杖
候荆扉雉雉麥苗秀蠶眠桑葉稀田夫荷鋤
至相見語依依即此羨閑逸悵然吟式微

春中田園作

屋上春鳩鳴村邊杏花白持斧伐遠楊荷鋤
覘泉脉歸燕識故巢舊人看新曆臨觴忽不
御惆悵遠行客

過李揖宅

閑門秋草色終日無車馬客來深巷中犬吠
寒林下髮散時未簪道書行尚把與我同心
人樂道安貧者一罷宜城酌還歸洛陽社

飯覆釜山僧

晚知清靜理日與人群踈將候遠山僧先期
掃弊廬果從雲峯裏顧我蓬高居藉草飯松
屑焚香看道書燃燈晝欲盡鳴磬夜方初已
悟寂爲樂此生閑有餘思歸何必深身世猶
空虛

謁璿上人并序

上人外人內天不定不亂捨法而淵泊無心
而雲動色空無得不物物也默語無際不言
言也故吾徒得神交焉玄關大啓德海群泳
時雨旣降春物具美序於詩者人百其言
少年不足言識道年已長事往安可悔餘生
幸能養誓從斷臂血不復嬰世網浮名寄纓
佩空性無羈鞅風承大導師焚香此瞻仰頽
然居一室覆載紛萬象高柳早鶯啼長廊春

雨響牀下阮家疑窓前筇竹杖方將見身雲
陋彼示天壤一心在法要願以無生獎

王摩詰集卷第一

王摩詰集卷第二

五言古詩

送魏郡李太守赴任

與君伯氏別又欲與君離君行無幾日當復
隔山陂蒼茫秦川盡日落桃林塞獨樹臨關
門黃河向天外前經洛陽陌宛洛故人稀故
人離別盡淇上轉驂駢企予悲送遠惆悵睢
陽路古木官渡平秋城鄴宮故想君行縣日
其出從如雲遙思魏公子復憶李將軍

送陸員外

郎署有伊人居然古人風天子顧河北詔書
除征東拜手辭上官緩步出南宮九河平原
外七國薊門中陰風悲枯桑古塞多飛蓬萬
里不見虜蕭條胡地空無爲費中國更欲邀
竒功遲遲前相送握手嗟異同行當封侯歸
甯訪商山翁

送宇文太守赴宣城

寥落雲外山迢遞舟中賞饒吹發西江秋空
多清響地迥古城蕪月明寒潮廣時蹇敬亭
神復解罟師網何處寄相思南風吹五兩

送綦母祕書棄官還江東

明時久不達棄置與君同天命無怨色人生
有素風念君拂衣去四海將安窮秋天萬里
淨日暮澄江空清夜何悠悠扣舷明月中和
光魚鳥際澹爾蒹葭叢無庸客昭世衰髮日
如蓬頑踈暗人事僻陋遠天聰微物縱可採
其誰爲至公余亦從此去歸耕爲老農

奉送六舅歸陸渾

伯舅吏淮泗卓魯方喟然悠哉自不競退耕
東臯田條桑臘月下種杏春風前酌醴賦歸
去共知陶令賢

送別

下馬飲君酒問君何所之君言不得意歸卧
南山郵但去莫復問白雲無盡時

送張五歸山

送君盡惆悵復送何人歸幾日同携手一朝
先拂衣東山有茅屋幸爲掃荆扉當亦謝官
去豈令心事違

齊州送祖三

相逢方一笑相送還成泣祖帳已傷離荒城
復愁入天寒遠山淨日暮長河急解纜君已
遙望君猶佇立

送緡雲苗太守

手疏謝名主腰章爲長吏方從會稽郊更發
汝南騎按節下松陽清江響鏡吹露冕見三

吳方知百城貴

送從弟蕃遊淮南

讀書復騎射帶劍遊淮陰淮陰少年輩千里
遠相尋高義難自隱明時寧陸沈島夷九州
外泉館三山深席帆聊問罪卉服盡成擒歸
來見天子拜爵賜黃金忽思鱸魚膾復有滄
洲心天寒蒹葭渚日落雲夢林江城下楓葉
淮上聞秋砧送歸青門外車馬去駸駸惆悵
新豐樹空餘天際禽

送高道弟耽歸臨淮作

少年客淮泗落魄居下邳遨遊向燕趙結客
過臨淄山東諸侯國迎送紛交馳自爾厭遊
俠閉戶方垂帷深明戴家禮頗學毛公詩備
知經濟道高卧陶唐時聖主詔天下賢人不
得遺公吏奉纁組安車去茅茨君王蒼龍闕
九門十二達群公朝謁罷冠劍下丹墀野鶴
終踉蹌威鳳徒叅差或問理人術但致還山
詞天書降北闕賜帛歸東菑都門謝親故行

路日逶遲孤帆萬里外森漫將何之江天海
陵郡雲日淮南祠杳冥滄洲上蕩莽無人知
緯蕭或賣藥出處安能期

送別

聖代無隱者英靈盡來歸遂令東山客不得
顧採薇既至君門遠孰云吾道非江淮度寒
食京洛縫春衣置酒臨長道同心與我違行
當浮桂棹未幾拂荆扉遠樹帶行客孤城當
落暉吾謀適不用勿謂知音稀

送張舍人佐江州同薛據十韻

東帶趨承明守官唯謁者清晨聽銀蚪薄暮
辭金馬受辭未嘗易當是方知寡清範何風
流高文有風雅忽佐江上州當自潯陽下逆
旅到三湘長途應百舍香爐遠峯出石鏡澄
湖瀉董鳳杏成林陶潛菊盈把范蠡常好之
廬山我心也送君思遠道欲以數行灑

送韋大夫東京留守

人外遺世慮空端結遐心曾是巢許淺始知

堯舜深蒼生詎有物黃屋如喬林上德撫神
運冲和穆宸襟雲雷康屯難江海遂飛沉天
工寄人英龍袞瞻君臨名器苟不假保釐固
其任素質貫方領清景照華簪慷慨念王室
從容獻官箴雲旗蔽三川畫角發龍吟晨揚
天漢聲夕卷大河陰窮久業已寧逆虜遺之
擒然後解金組拂衣東山岑給事黃門省秋
光正沉沉功名與身退老病隨年侵君子從
相訪重玄其可尋

資聖寺送甘二

浮生信如寄薄宦夫何有來往本無歸別離
方此受柳色藹春餘槐陰清夏首不覺御溝
上銜悲執杯酒

留別山中温古上人兄并示舍弟縉
解薛登天朝去師偶時哲豈唯山人兼負
松上月宿昔同遊止致身雲霞末開軒臨潁
陽卧視飛鳥没好依盤石飯屢對瀑泉渴理
齊小狎隱道勝寧外物舍弟官崇高宗兄比

削髮荆扉但灑掃乘閑當過歇

觀別者

青青楊柳陌陌上別離人愛子遊燕趙高堂
有老親不行無可養行去百憂新切切委兄
弟依依向四鄰鄰門悵飲畢從此謝親賓揮
涕逐前侶含悽動征輪車徒望不見時見起
行塵吾亦辭家久看之淚滿巾

別弟縉後登青龍寺望藍田山

陌上新別離蒼茫四郊晦登高不見君故山
復雲外遠木蔽行人長天隱秋塞心悲宦遊
子何處飛征蓋

別弟妹二首

兩妹日成長雙鬟將及人已能持寶瑟自解
掩羅巾念昔別時少未知踈與親今來始離
恨拭淚方殷勤
小弟更孩幼歸來不相識同居雖漸慣見人
猶未覓宛作越人語殊甘水鄉食別此最爲
難淚盡有餘憶

別綦母潛

端笏明光宮歷稔朝雲陛詔刊延閣書高議
平津邸適意輕偶人虚心削繁禮盛得江左
風彌工建安體高張多絕絃截河有清濟嚴
冬爽群木伊洛方清泚渭水冰下流潼關雪
中啓荷篠幾時還塵纓待君洗

新晴野望

新晴原野曠極目無氛垢郭門臨渡頭村樹
連溪口白水明田外碧峯出山後農月無閑

人傾家事南畝

晦日遊大理韋卿城南別業四首

與世淡無事自然江海人側聞塵外遊解驂
輒朱輪平野照暄景上天垂春雲張組竟北
阜汎舟過東鄰故鄉信高會牢醴及佳辰幸
同擊壤樂心荷堯為君

郊居杜陵下永日同攜手人里靄川陽平原
見峯首園廬鳴春鳩林薄媚新柳上卿始登
席故老前為壽臨當遊南陂約略執杯酒歸

歎絀微官惆悵心自咎

冬中餘雪在墟上春流駛風日暢懷抱山川
好天氣彫胡失晨炊庖膾亦後至高情浪海
岳浮生寄天地君子外簪纓埃塵良不啻所
樂衡門中陶然忘其貴

高館臨登陂曠然蕩心目淡蕩動雲天玲瓏
映墟曲鵲巢結空林雉雊響幽谷應接無閑
暇徘徊以躑躅紆組上春堤側弁倚喬木弦
望忽已晦後期洲應綠

冬日遊覽

步出城東門試騁千里目青山橫蒼林赤日
團平陸渭北走邯鄲關東出函谷秦地萬方
會來朝九州牧雞鳴咸陽中冠蓋相追逐丞
相過列侯群公餞光祿相如方老病獨歸茂
陵宿

自大散已往深林密竹磴道盤曲四
五十里至黃牛嶺見黃花川

危徑幾萬轉數里將三休迴環見徒侶隱映

隔林丘岫颯松上雨潺潺石中流靜言深溪
裏長嘯高山頭望見南山陽白露靄悠悠青
泉麗已淨綠樹鬱如浮曾是厭蒙密曠然消
人憂

休假還舊業便使

謝病始告歸依依入桑梓家人皆佇之相候
衡門裏時輩皆長年成人舊童子上堂嘉慶
畢顧與姻親齒論舊忽餘悲目存且相喜田
園轉蕪沒但有寒泉水衰柳日蕭條秋光清
邑里入門乍如客休騎非便止中飯顧王程
離憂從此始

宿鄭州

朝與周人辭暮投鄭人宿他鄉絕儔侶孤客
親僮僕宛洛望不見秋霖晦平陸田父草際
歸村童雨中牧主人東臯上時稼遶茅屋蟲
思機杼悲雀喧禾黍熟明當渡京水昨晚猶
金谷此去欲何言窮邊徇微祿

渡河到清河作

汎舟大河裏積水窮天涯天波忽開折郡邑
千萬家行復見城市宛然有桑麻迴瞻舊鄉
國森漫連雲霞

苦熱

赤日滿天地火雲成山嶽草木盡焦卷川澤
皆竭涸輕紈覺衣重密樹苦陰薄莞簟不可
近絺綌再三濯思出宇宙外曠然在寥廓長
風萬里來江海蕩煩濁却顧身為患始知心
未覺忽入甘露門宛然清涼樂

納涼

才萬餘株清流貫其中前臨大川口豁達
來長風漣漪涵白沙素鮪如遊空偃卧盤石
上翻濤沃微躬漱流復濯足前對釣魚翁貪
餌凡幾許徒思蓮葉東

偶然作六首

楚國有狂夫茫然無心想散髮不冠帶行歌
南陌上孔丘與之言仁義莫能獎未能皆問
天何事須擊壤復笑採薇人胡為乃長往

田舍有老翁垂白衡門裏有時農事閑斗酒
呼鄰里喧聒茅簷下或坐或復起短褐不爲
薄園葵固足美動則長子孫不曾向城市五
帝與三王古來稱君子干戈將揖讓畢竟何
者是得意苟爲樂野田安足鄙且當忘懷去
行行沒餘齒

日夕見太行沉吟未能去問君何以然世網
嬰我故小妹日成長兄弟未有娶家貧祿既
薄儲蓄非有素幾迴欲奮飛跼蹐復相顧孫
登長嘯臺松竹有遺處相去詎幾許故人在
中路愛染日已薄禪寂日已固忽乎吾將行
寧俟歲云暮

陶潛任天真其性頗耽酒自從棄官來家貧
不能有九月九日時菊花空滿手中心竊自
思倘有人送否白衣携壺觴果來遺老叟且
喜得斟酌安問升與斗奮衣野田中今日差
無負兀傲迷東西囊笠不能守傾倒強行行
酣歌歸五柳生事不曾問肯媿家中婦

趙女彈箜篌復能邯鄲舞夫婿輕薄兒鬪雞
事齊主黃金買歌笑用錢不復數許史相經
過高門盈四牡客舍有儒生昂藏出鄒魯讀
書三十年腰下無尺組被服聖人教一生自
窮苦
老來懶賦詩惟有老相隨宿世謬詞客前身
應畫師不能捨餘習偶被世人知名字本皆
是此心還不知

西施詠

艷色天下重西施寧久微朝為越溪女暮作
吳宮妃賤日豈殊衆貴來方悟稀邀人傅脂
粉不自着羅衣君寵益嬌態君憐無是非當
時浣沙伴莫得同車歸持謝鄰家子效嚙安
可希

李陵詠

漢家李將軍三代將門子結髮有奇策少年
成壯士長驅塞上兒深入單于壘旌旗列相
向簫鼓悲何已日暮沙漠郵戰聲煙塵裏將

令驕虜滅豈獨名王侍既失大軍援遂嬰穹
廬恥少小蒙漢恩何堪坐思此深衷欲有報
投軀未能死引領望子卿非君誰相理

鷲子龕禪師

山中燕子龕路劇羊腸惡裂地競盤屈插天
多峭嶮瀑泉吼而噴恠石看欲落伯雨訪未
知五丁愁不鑿上人無生緣生長居紫閣六
時自鎚磬一飲尚帶索種田燒白雲斫漆響
丹壑行隨拾栗猿歸對巢松鶴時許山神請

偶逢洞仙博救世多慈悲即心無行作周商
倦積阻蜀物多淹泊巖腹乍旁穿澗唇時外
拓橋因倒樹架柵值垂藤縛鳥道悉已平龍
宮為之涸跳波誰揭厲絕壁免捫摸山木日
陰陰結叻歸舊林一向石門裏任君春草深

羽林騎閨人

秋月臨高城城中管絃思離人堂上愁稚子
堦前戲出門復映戶望望青絲騎行人過欲
盡征夫終不至左右寂無言相看共垂淚

冬夜書懷

冬宵寒且永夜漏宮中發草白靄繁霜木衰
澄清月麗服映頰頰朱燈照華髮漢家方尚
少顧影慙朝謁

早朝

皎潔明星高蒼茫遠天曙槐霧暗不開城鴉
鳴稍去始聞高閣聲莫辨更衣處銀燭已成
行金門儼駟馭

寓言二首

朱紱誰家子無乃金張孫驪駒從白馬出入
銅龍門問爾何功德多承明主恩鬪鷄平樂
館射雉上林園曲陌車騎盛高堂珠翠繁柰
何軒富貴不與布衣言

君家御溝上垂柳夾朱門列鼎會中貴鳴珂
朝至尊生死在八議窮達由一言須識苦寒
士莫矜狐白溫

獻始興公

寧棲野樹林寧飲澗水流不用坐梁肉崎嶇

見王侯鄙哉匹夫節布褐將白頭任智誠則
短守仁固其優側聞大君子安問黨與讎所
不賣公器動爲蒼生謀賤子跪自陳可爲帳
下不感激有公議曲私非所求

哭殷遙

人生能幾何畢竟歸無形念君等爲死萬事
傷人情慈母未及葬一女纔十齡決奔寒郊
外蕭條聞哭聲浮雲爲蒼茫飛鳥不能鳴行
人何寂寞白日自淒清憶昔君在時問我學
無生勸君苦不早令君無所成故人各有贈
又不及平生負爾非一途慟哭返柴荆

歎白髮

我年一何長髮髮日已白俛仰天地間能爲
幾時客惆悵故山雲徘徊空日夕何事與時
人東城復南陌

故南陽夫人樊氏挽歌

石窳恩榮重金吾車騎盛將朝每贈言入室
還相敬疊鼓秋城動懸旌寒日映不言長不

歸環珮猶將聽

王摩詰集卷第二

王摩詰集卷第三

七言古詩

登樓歌

聊上君兮高樓飛薨鱗次兮在下俯十二兮
通衢綠槐參差兮車馬却瞻兮龍首前眺兮
宜春王畿鬱兮千里山河壯兮咸秦舍人下
兮青宮據胡牀兮書空執戟疲於下位老夫
好隱兮牆東亦幸有張伯英草聖兮龍騰蚪
躍擺長雲兮捩迴風琥珀酒兮彫胡飯君不

御兮日將晚秋風兮吹衣夕鳥兮爭返孤砧
發兮東城林薄暮兮蟬聲遠時不可兮再得
君何為兮偃蹇

夷門歌

七雄雄雌猶未分攻城殺將何紛紛秦兵益
圍邯鄲急魏王不救平原君公子為嬴停駟
馬執轡愈恭意愈下亥為屠肆鼓刀人嬴乃
夷門抱關者非但慷慨獻竒謀意氣兼將身
命酬向風刎頸送公子七十老翁何所求

雙黃鵠歌送別

天路來兮雙黃鵠雲上飛兮水上宿撫翼和
鳴整羽族不得已忽分飛家在王京朝紫微
主人臨水送將歸悲笳嘹淚垂舞衣賓欲散
兮復相依幾往返兮極浦尚徘徊兮落暉岸
上火兮相迎將夜入兮邊城鞍馬歸兮佳人
散悵離憂兮獨含情

新秦郡松樹歌

青青山上松數里不見今更逢不見君心相

憶此心向君君應識爲君顏色高且閑亭亭
迥出浮雲間

青雀歌

青雀翅羽短未能遠食玉山禾猶勝黃雀爭
上下唧唧空倉復若何

同詠

盧象

啾啾青雀兒飛來飛去仰天池逍遙飲啄安
涯分何假扶搖九萬爲

王縉

林間青雀兒來往翩翩繞一枝莫言不解銜
環報但問君恩今若爲

崔興宗

青鳧繞青林翩翩陋體一微禽不應長在藩
籬下他日凌雲誰見心

裴迪

動息自適性不曾妄與鷺雀群幸忝鴛鴦早
相識何時提携致青雲

贈徐中書望終南山歌

晚下兮紫微悵塵事兮多違駐馬兮雙樹望
青山兮不歸

送友人歸山歌二首

山寂寂兮無人又蒼蒼兮多木群龍兮滿朝
君何爲兮空谷文寡和兮思深道難知兮行
獨悅石上兮流泉與松間兮草屋入雲中兮
養雞上山頭兮抱犢神與棗兮如瓜虎賣杏
兮收穀愧不才兮妨賢嫌既老兮貪祿誓解
印兮相從何詹尹兮可卜

山中人兮欲歸雲冥冥兮雨霏霏水驚波兮
翠管靡白鷺忽兮翻飛君不可兮褰衣山萬
重兮一雲混天地兮不分樹暍曖兮氛氲猿
不見兮空聞忽山西兮夕陽見東臯兮遠村
平蕪綠兮千里眇惆悵兮思君

魚山神女祠歌二首

迎神曲

坎坎擊鼓魚山之下吹洞簫望極浦女巫巫進
紛屢舞陳瑤席湛清醕風淒淒兮夜雨神之

來兮不來使我心兮苦復苦

送神曲

紛進拜兮堂前目眷眷兮瓊筵來不語兮意
不傳作暮雨兮愁空山悲急管思繁絃靈之
駕兮儼欲旋倏雲收兮雨歇山青青兮水潺
湲

隴頭吟

長城少年遊俠客夜上戍樓看太白隴頭明
月迥臨關隴上行人夜吹笛關西老將不勝

愁駐馬聽之雙淚流身經大小百餘戰麾下
偏裨萬戶侯蘇武纔為典屬國節旄空盡海
西頭

老將行

少年十五二十時步行奪取胡馬騎射殺山
中白額虎肯數鄴下黃鬚兒一身轉戰三千
里一劔曾當百萬師漢兵奮迅如霹靂虜騎
崩騰畏疾藜衛青不敗由天幸李廣無功緣
數竒自從棄置便衰朽世事蹉跎成白首昔

時飛箭無全目今日垂楊生左肘路傍時賣
故侯瓜門前學種先生柳茫茫古木連窮巷
遼落寒山對虛牖誓令踈勒出飛泉不似潁
川空使酒賀蘭山下陣如雲羽檄交馳日夕
聞節使三河募年少詔書五道出將軍試拂
鐵衣如雪色聊持寶劔動星文願得燕弓射
天將耻令越甲鳴吳軍莫嫌舊日雲中守猶
堪一戰立功勳

燕支行

漢家天將才且雄時來謁帝明光宮萬乘親
推雙闕下千官出餞五陵東誓辭甲第金門
裏身作長城玉塞中衛霍才堪一騎將朝廷
不數貳師功趙魏燕韓多勁卒關西俠少何
咆勃報讎只是聞嘗膽飲酒不曾妨刮骨畫
戟雕戈白日寒連旗大旆黃塵沒疊鼓遙翻
瀚海波鳴笳亂動天山月麒麟錦帶佩吳鉤
颯踏青驪躍紫騮拔劔已斷天驕臂歸鞍共
飲月支頭漢兵大呼一當百虜騎相看哭且

愁教戰雖令赴湯火終知上將先伐謀

桃源行

魚舟逐水愛山春兩岸桃花夾去津坐看紅
樹不知遠行盡青溪不見人山口潛行始隈
隩山開曠望旋平陸遙看一處攢雲樹近入
千家散花竹樵客初傳漢姓名居人未改秦
衣服居人共住武陵源還從物外起田園月
明松下房櫳靜日出雲中雞犬喧驚聞俗客
爭來集競引還家問都邑平明閭巷掃花開
薄暮漁樵乘水入初因避地去人間更問成
仙遂不還峽裏誰知有人事世中遙望空雲
山不疑靈境難聞見塵心未盡思鄉縣出洞
無論隔山水辭家終擬長游衍自謂經過舊
不迷安知峯壑今來變當時只記入山深青
溪幾度到雲林春來遍是桃花水不辨仙源
何處尋

洛陽女兒行

洛陽女兒對門居纔可顏容十五餘良人玉

勒乘駉馬侍女金盤贈鯉魚畫閣朱樓盡相
望紅桃綠柳垂簷向羅帷送上七香車寶扇
迎歸九華帳狂夫富貴在青春意氣驕奢劇
季倫自憐碧玉親教舞不惜珊瑚持與人春
窓曙滅九微火九微片片飛花璪戲罷曾無
理曲時粧成祇是薰香坐城中相識盡繁華
日夜經過趙李家誰憐越女顏如玉貧賤江
頭自浣沙

白鼇渦

南山之瀑水兮激石瀉瀑似雷驚人相對兮
不聞語聲翻渦跳沫兮蒼苔濕蘚老且厚春
草爲之不生獸不敢驚動鳥不敢飛鳴白鼇
渦濤戲瀨兮委身以縱橫主人之仁兮不網
不釣得遂性以生成

黃雀癡

黃雀癡黃雀癡謂言青鷺是我兒一一口銜
食養得成毛衣到大啁啾解游颺各自東西
南北飛薄暮空巢上羈雌獨自歸鳳凰九雛

亦如此慎莫愁思顛顛損容輝

贈裴迪

不相見不相見來久日日泉水頭常憶同携
手攜手本同心復嘆忽分襟相憶今如此相
思深不深

榆林群歌

山頭松栢林山下泉聲傷客心千里萬里春
草色黃河東流流不息黃龍戍上遊俠兒愁
逢漢使不相識

問寇校書雙溪

君家少室西為復少室東別來幾日今春風
新買雙溪定何似餘生欲寄白雲中

寄崇梵僧

崇梵僧崇梵僧秋歸覆釜春不還落花啼鳥
紛紛亂澗戶山窓寂寂閑峽裏誰知有人事
郡中遙望空雲山

奉和聖製天長節賜宰臣歌應制

太陽升兮照萬方開閭闔兮臨玉堂儼冕旒

兮垂衣裳金天淨兮麗三光彤庭曙兮延八
荒德合天兮禮神通靈芝生兮慶雲見唐堯
后兮稷高臣匝宇宙兮華胥人盡九服兮皆
四鄰乾降瑞兮坤獻珍

同崔傅答賢弟

洛陽才子姑蘇客桂苑殊非故鄉陌九江楓
樹幾回青一片揚州五湖白揚州時有下江
兵蘭陵鎮前吹笛聲夜火人歸富春郭秋風
鶴唳石頭城周郎陸弟爲儔侶對舞前溪歌
白紵曲几書留小史家草堂碁賭山陰墅衣
冠若話外臺臣先數夫君席上珍更聞臺閣
求三語遙想風流第一人

同比部揚員外十五夜遊有懷靜者
季雜言

承明少休沐建禮省文書夜漏行人息歸鞍
落日餘懸知三五夕萬戶千門闌夜出曙翻
歸傾城滿南陌陌頭馳騁盡繁華王孫公子
五侯家由來月明如白日共道春燈勝百花

聊看侍中千寶騎強識小婦七香車香車寶
馬共喧闐箇裏多情俠少年竟向長楊柳市
北肯過精舍竹林前獨有仙郎心寂寞却將
宴坐為行樂儻覺忘懷共往來幸霑同舍甘
藜藿

故人張誼工詩善易卜兼能丹青草
隸頃以詩見贈聊獲酬之

不逐城東遊俠兒隱囊紗帽坐彈碁蜀中夫
子時開卦洛下書生解詠詩藥欄花逕衡門
裏時復據梧聊隱几屏風誤點惑孫郎團扇
草書輕內史故園高枕度三春永日垂帷絕
四隣自想蔡邕今已老更將書籍與何人

荅張五弟

終南有茅屋前對終南山終年無客長閉關
終日無心長自閑不妨飲酒復垂釣君但能
來相往還

贈吳官

長安客舍熱如煮無箇茗糜難御暑空搖白

團其諦苦欲向縹囊還歸旅江鄉鯖鮓不寄
來秦人湯餅那堪許不如儂家任挑達草屨
蝮蝮富春渚

雪中憶李楫

積雪滿阡陌故人不可期長安千門復萬戶
何處躑躅黃金羈

送李睢陽

將置酒思悲翁使君去出城東麥漸漸雉子
斑槐陰陰到潼關騎連連車遲遲心中悲宋

又遠周間之南淮夷東齊兒碎碎織練與素
絲遊人賈客信難持五穀前熟方可爲下車
閉閣君當思天子當殿儼衣裳太官尚食陳
羽觴彤庭散綬垂鳴璫黃紙詔書出東廂輕
紈疊綺爛生光宗室子弟君最賢分憂當爲
百辟先布衣一言相爲死何況聖主恩如天
鸞聲噦噦魯侯旂明年上計朝京師須憶今
日斗酒別慎勿富貴忘我爲

送崔五大守

長安廐吏來到門朱文露網動行軒黃花縣
西九折坂玉樹宮南五丈原褒斜谷中不容
幘唯有白雲當露冕子午山裏杜鵑啼嘉陵
水頭行客飯劔門忽斷蜀川開萬井雙流滿
眼來霧中遠樹刀州出天際澄江巴字迴使
君年幾三十餘少年白晢專城居欲持畫省
郎官草迴與臨邛父老書

寒食城東即事

清溪一道穿桃李演漾綠蒲涵白芷溪上人

家凡幾家落花共落東流水蹴踘屢過飛鳥
上鞦韆競出垂楊裏少年分日作遨遊不用
清明兼上巳

不遇詠

北闕獻書寢不報南山種田時不登百人會
中身不預五侯門前心不能身投河朔飲君
酒家在茂陵平安否且此登山復臨水莫問
春風動楊柳今人昨人多自私自我心不說君
應知濟人然後拂衣去肯作徒爾一男兒

王摩詰集卷第三



